

Date – 26/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kumin hian Mizoramah thli, ruah leh rial thawk avangin In 4726 a chhia a, heng zinga 201 chu luah zui tlak lohin a chhe vek.
2. Ram chhunga Civil chawimawina sang, Padma Shree Award dawngtu, TNT Founder Pu Sangthankima lawmman dawn lawmna inkhawmah Chief Minister leh Home Minister te an tel.
3. Thlipui lo thleng palh thei nia sawi chungchangah chi-ai lova fimkhur tur leh inring turin Aizawl DC chuan mipui a chah.
4. Presbyterian Kohhran New Serchhip Pastor Bial huaihawtin Ruihhlo Do Pawl din a ni.



DM&R

Kumin hian Mizoramah thli, ruah leh rial thawk avangin In 4726 a chhia a, heng zinga 201 chu luah zui tlak lohin a chhe vek a ni.

Disaster Management & Rehabilitation minister Pu K. Sapdanga hova fupui hmachhawn dan leh lo inhmakhua lawk dan ngaihtuaha thutkhawmah he thu hi tarlan a ni a, report-a a lan danin kuminah thli, ruah leh rial thawk vangin Mizoramah In chhe vek 201, luah zui tlak tawh loha chhia 630 leh thawmthat deuha luah leh nghal theih 3895, a vaiin In 4726 a awm.

Pu K. Sapdanga chuan Mizoramin lirnghing, leimin, tuilian, thlipui leh a dang a tuar fo a. Nunna hial hloh leh chenna in chhia an hre fo thin a. Kuminah fur hun pangngai a thlen hma hauhin chhiatna an tuar fê tih a sawi a. Khaw thenkhat ruahsur, thli leh rial tuar nasa zual an awm a, chhiat tawkte an tawrhpu rualin State Disaster Response Fund atanga tanpuina awm thei leh kaihhruaina awm ang zela chhawmdawl thuai a tul, a ti a. A hlimchhawn, an mamawh laia tanpuina pek a hlu bik tih sawiin SDRF norms anga puihna an pek theihna turin hun an mamawh a, chuti chung chuan a hun takah pehhel khawtlai loin, an mamawh lai taka pek ngei an tum tur a ni, a ti.

Home Minister chuan tunhnaia ruah leh rial avanga hmun hrang hranga harsatna thlengah District Disaster Management Authority/DC te hmalakna leh an mawhphurhna hlenchhuah danah an remhriat dan a inchen lo viau niin a sawi a; fupui a intan dawn a, eng harsatnain nge mi tlakbuak dawn hriat a

ni lo a, hei vang hian District tina DC leh DDMA Chairman te chu inbuatsaih lawk turin a chah a, state sorkar pawh chhiatna tawkte pui nghal thei turin a inpeih reng a ni, a ti.

<><><>

CM & HM AT TNT

Ram chhunga Civil chawimawina sang, Padma Shree Award dawngtu, TNT Founder Pu Sangthankima lawmman dawn lawmna inkhawm nimina TNT, Muanna Veng, Zuangtuia neih chu Chief Minister Pu Lalduhoma leh Home Minister Pu K. Sapdanga ten an telpui.

Thu sawiin Chief Minister chuan, sawrkarna an siam tan tirh khan mahni In pawh tlawh hmasa lovin TBCC a tlawh hmasa a, thalai ruihhlo ngai te a vei a, chhanchhuah tumin hma an la chho mek a ni, a ti. Ruihhlo Do Core Committee, hun rei tak thu tawh lo pawh tinung lehin tunhnaiah an thukhawm a, ruihhlo do turin hma an la dawn, a ti.

Pu Lalduhoma chuan Pathian koha rawngbawltute thuawih chu malsawmna a ni, a ti a. Pu Sangthankima pawh Pathianin a kohna ang taka hnathawktu a ni a; amah thawhpuitu zawng zawng ten a thu lo awih zel se, a ti a. Pathian duh dan ang zela kalin Pathian a chawimawi flat a, nasa takin Pathianin a chawimawi let ve ta a ni, a ti.

Padma Shree Dr. Sangthankima pawhin thu sawiin, chawimawina a dawn laia a rilrua lang chu a pa a ni a; a pa khan India President chenna a ngaisang hle a, a chanchin a hrilh thin a. Chu in ropuiah ngei a fapa soal berin lawmman a dawng khan a hnuk a ti ulh a ni, a ti.

Home Minister Pu K. Sapdanga pawhin thu sawiin, harsatna tawk mi Sing t el lo enkawl tawhtu Pu Sangthankima hnathawh chu a ropui a. A lawmman dawn pawh a phu ngawih ngawih a, ani tluka phu an awm bik chuang lo, a ti.

Thutak Nunpuitu Team, TNT hi Pu Sangthankima hian kum 1984 November ni 4 khan Champhai daiah a kalpui tan a. A hnuah Aizawl lamah insawnin Durtlangah bul an tan a; a hnuah tuna an awmna ram hi Pu K. Thangzuala'n a hmantir ta a ni. TNT hian thalai chhanchhuah ngai mi 43,355, Pangpar huanah mi 2,414 leh fahrah 939 an enkawl tawh a ni. Tun dinhmun bikah an Addict Centre pahnihah mi 840, Pangpar huanah mi 550 leh fahrah 340 an nei mek a. An enkawl zingah hian hnam dang engemawzat an tel a. Aizawl pawn lamah Kolasib ah mi 367, Lungleiah 720, Champhaiah 320 leh Tahan-ah mi 250 an enkawl mek bawk. TNT atanga tha taka enkawl chhuah tawh TNT Team worker 94 an awm mek a. TNT atanga pawl 10 pass hi naupang 184 an awm tawh a, BA leh MA thlenga pass pawh an nei nual tawh a ni.

<><><>

NEW SERCHHIP RUIHHLO DO PAWL

Presbyterian Kohhran New Serchhip Pastor Bial huaihawtin Ruihhlo Do Pawl din a ni.

Kumina New Serchhip Pastor Bial Inkhawmpui thurel bawhzuiin Bial Standing Committee chuan nimin khan an huam chhunga an kohhran bakah kohhran dang zawng zawng bakah New Serchhip North leh South VC leh tlawmngai pawl - YMA, MHIP leh MUP Branch hrang hrang aiawhte chu Ruihhlo Do chungchang sawiho turin a sawm khawm a. Kohhran, VC leh Tlawmngai Pawl hrang hrang aiawh mi 100 chuang an kal khawm a. Heta kalkhawmte hian New Serchhip VC pahnih (North leh South) huam chhung zawng zawng bakah Chhiahtlang VC huam chhunga awm, New Serchhip Presbyterian Pastor Bial huam chhunga awm ni si Bukpui pawh huam telin ruihhlo do kawnga hma latu tur, 'New Serchhip Ruihhlo Do Pawl Committee' dinin hruaitu tur pawh pawl hrang hrang atangin an inruat nghal a ni.



CYCLONE WARNING

Bay of Bengal-a Cyclone insiam chuan Bangladesh leh West Bengal leh a chhehvel te a nuai tel dawn avangin Mizoram hmun hrang hrang - a bikin Mamit, Kolasib, Aizawl, Champhai, Serchhip, Lawngtlai leh Siaha District-ah thlipui leh ruah a thawh ve rin a ni a,

Aizawl Meteorological Centre Director Sudheer Kumar Dwivedi hnen atanga thu dawn danin, District dang Lunglei, Saitual, Hnahthial, Khawzawl te chuan naktuk khian ruah leh thlipui, darkar khata kilometer 50 leh 60 inkar emaw kilometer 70 emawa chak a tuar rin a ni.

Aizawl DC chuan nimin khan thuchhuah siamin Bay of Bengal chhim chhak lama thlipui insiam mek, Cyclone Remal tia hming an vuahin a hrût theih tur zingah Mizoram tel lo mah se, Mizoram-ah ruah a rawn thlen tura ngaih a ni a; wawiin leh naktukah Mizoram hmun thenkhatah thli na vak lo thawk theia ngaih a ni, an ti.

Thlipui chungchangah hian mipuite chia lo turin Aizawl DC chuan a hriattir a; amaherawhchu thlipui leh ruah thleng thut palh thei laka fimkhur tur leh inring turin a chah thung.

Khuarel chhiatna a lo thlenin District Emergency Operational Centre Toll Free Number – 1077 chu engtik lai pawha biakpawh theih reng a ni a, engemaw vanga line tlang thei lo a nih pawhin mahni bialtu Zonal Officer-te hnenah chhiatna thlen thu hriattir theih a nih thu Aizawl DC chuan mipuite a hriattir a ni.



ASF

Lai Autonomous District Council-a Veterinary Officer Dr. Lalnunpuia Chinzah chuan LADC huam chhungah vawk pul hri, African Swine Fever (ASF) vanga Vawk damlo a awm an hriat loh thu Lawngtlaia Akashvani Corr, Lalnggheta Ralte zawhna chhangin a sawi.

ASF hrileng kumina a awmthar leh tantirh atangin LADC hnuaiia AH&Vety Department chuan Dr. Lalnunpuia Chinzah hovin khaw hrang hrangah free clinic neiin hma an la nghal a, kâr kalta chung pawh khan Sangau RD Block huam chung khaw thenkhat an tlawh.

An tlawh khuaah te Vawk dam lo, ASF vei an hriat loh thu Dr. Lalnunpuia chuan sawiin, hri laka venna tur, Vawk In silfaina tur damdawi te semin a hman dan an zirtir a, ASF laka an him nana tih tur leh tih loh tur Vawk vulhtute hrilhin invenna chuan awmzia a nei hlea an hriat thu a sawi.

Free Clinic hi Vawk, Ui leh Ar vulhtuten an pan nasa zual a. Ran dam lo, Free clinic neiinna kalpui remchang lo te chu Vety Doctor hovin an pan a, anmahni râwntute hnenah ran damdawi a thlawnin an sem thin.

Dr. Lalnunpuia Chinzah chuan tangkai leh hlawk taka Free Clinic an neih theihna chhan chu Village Council leh Branch YLA ten theihtawp an chhuahpui vang niin a sawi.

(Lalnggheta Ralte, Lawngtlai PTC)

